

20-04-2010

**UPA 2010/29**  
(UKA 2009/91)

**Meeqqat atuarfianni klassini qullerni atuartut atuarnermut  
tapiiffigineqartarnerat pillugu Inatsisartut peqqussutaata atorunnaarsinnera  
pillugu Inatsisartut Inatsisissaattut siunnersuut**

**pillugu**

**Ilaqutariinnermut Ataatsimiititaliap**

**ISUMALIUTISSIISSUTAA**

**Inatsisissatut siunnersuut aappassaaneerreqarnerani saqqummiunneqartoq**

Ilaqutariinnermut Ataatsimiititaliaq kingullermik suliarinninnermini ukuninnga  
inuttaqarpoq:

Inatsisartunut ilaasortaq Debora Kleist, Inuit Ataqatigiit  
Inatsisartunut ilaasortaq Jane Petersen, Inuit Ataqatigiit  
Inatsisartunut ilaasortaq Andreas Uldum, Demokraatit  
Inatsisartunut ilaasortaq Ruth Heilmann, Siumut  
Inatsisartunut ilaasortaq Knud Kristiansen, Atassut  
Sinniisussaq Michael Rosing, Demokraatit

Inatsisissatut siunnersuut Inatsisartunit UKA 2009-mi siullermeerneqareermat  
Ilaqutariinnermut Ataatsimiititaliap misissorpaa.

**Apeqqutit:**

Ilaqutariinnermut Ataatsimiititaliap 16. oktober 2009-mi allakkamini apeqqutit  
arlallit akineqaqqullugit Kultureqarnermut, Ilinniartitaanermut, Ilisimatusarnermut  
Ilageeqarnermullu Naalakkersuisoq qinnuigaa. Kultureqarnermut,  
Ilinniartitaanermut, Ilisimatusarnermut Ilageeqarnermullu Naalakkersuisup

akissuteqaataa isumaliutissiisummut matumunnga ilanngussatut ilanngunneqarpoq. Akissuteqaammi Ilaqutariinnermut Ataatsimiititaliap apeqquteqaatai ilanngunneqarput. Akissuteqaat Ilaqutariinnermut Ataatsimiititaliamit qujassutigineqarpoq isumaliutissiisummilu matumani pineqartut ilaat erseqqissaassutigiumallugit.

### **Siunnersuutip siunertaa imarisaalu:**

Inatsisissatut siunnersuummi siunertarineqarpoq meeqqat atuarfianni klassini qullerni atuartut atuarnermut tapiiffigineqartarnerat pillugu Inatsisartut peqqussutaat 1982-imeersup 1. august 2010-mit atuutilersumik atorunnaarsinneqarnissaa. Inatsisip atorunnaarsinniarneqarneranut tunngavilersuutigineqarpoq Inatsisartut peqqussutaata nr. 12-ip, 20. november 2006-meersup akuersissutigineratigut aammalu meeqqat atuarfiat pillugu Inatsisartut peqqussutaata allanngortinneqarneranik Inatsisartut peqqussutaata nr. 12-ip, 20. november 2006-meersup atuutilersinneqarnera pillugu nalunaarummik nr. 15-imik, 23. juni 2008-meersumik aalajangersaanikkut maleruagassiornermi siunertarineqartoq atorunnaartoq, tassa atuartunut tamanut ukiunik qulinik atuartussaanerup eqqunneqarnera pissutaalluni. 1970-ikkunni 1980-ikkunnilu atuartussaataitanermit, taamani ullumikkumut sanilliullugu ukiut qulit ataallugit sivisussuseqartumit sivisunerusumik atuartut atuarnissaannut tapiissutit kajumissuseqalersitsinissaat siunertaavoq.

### **Ilaqutariinnermut Ataatsimiititaliamit oqaaseqaatai:**

Siunnersuutit saqqummiunneqartut tusarniaassutinut akissutinik ilaqartinneqartarnissaat siunissami qulakkeertaqqullugu Ilaqutariinnermut Ataatsimiititaliap Naalakkersuisut qinnuigai. Maleruagassiassatut siunnersuutit Inatsisartunit taamatullu Naalakkersuisunit suliarineqartussat pillugit tusarniaanermut akissutit ilisimasanik, paasissutissanik oqaaseqaatinillu attuumassuteqartunik paasissutissiisinnaasut Inatsisartut ataatsimiititaliat isumaqarput. Inatsisartuni aalajangiiniarnermi tunngaviit nukittorsarumallugit ilaasortat Inatsisartunilu ataatsimiititaliat tusarniaanermi akissutigineqartunik paasisaqartariaqarput.

KANUKOKA-miit paasissutissiisutigineqartoq naapertorlugu malittarisassat atorunnaarsinneqartussatut siunnersuutigineqartut naapertorlugit atuartunut tapiissuteqartarneq kommunit ukiumut toqqaannartumik 7,25 mio. kr.-inik akeqartoq Ilaqutariinnermut Ataatsimiititaliap erseqqissaassutigaa. Tamatumunnga ilanngullugu tapiissuteqartarnerup allaffissornikkut minnerpaamik HK-tut atorfinnik marlunnik ilinniartitsisullu 107-t sulinerisa 1%-ianik naleqartutut KANUKOKA-p missiliorpaa. Malittarisassaq atorunnaarpat suliasat taakku kommuninit ilinniartitsisullu ilaannit suliarineqartarunnaassapput. Inatsit naapertorlugu atuartut ilaqutariillu qassit ukiumut tapiissuutisisarnersut apeqquteqarnermigut Ilaqutariinnermut Ataatsimiititaliap qulaajarniarsimavaa. Ukioq atuarfiusumi 2007/08-mi atuartut 758-t tapiissutisisimasut KANUKOKA-p nalorninartoqartillugu paasissutissiisutigaa. Atuartut amerlassusaannut tapiissutit annertussusaat

sanilliukkaanni atuartut pineqartut 758-t agguaqatigiissillugu ukiumut akileraarutitaqanngitsumik (7.250.000/758) = kr.-inik 9564,64-inik pisimapput. Tapiissutit pineqartut atuartut sumut atortarsimaneraat erseqqinnerusumik misissorneqarsimangilaq, taamatuttaaq meeqqat atuarfianni atuarnerup ilaani piumasuseq naapertorlugu klassini angajullerni atuartut atuarusulersinneqarniarnerannik siunertarineqartoq naapertorlugu tapiissutit sunniuteqarsimanersut naliliivigineqarsimangisaannarpoq.

### **Inassuteqaat:**

Ukiunik qulinik atuartussaataaernerup ingerlanneqalerneratigut inatsimmi siunertarineqartoq atorunnaartoq **Ataatsimiititaliami amerlanerussuteqartut Inuit Ataqtigiit Demokraatillu isumaqarput**. Tapiissutit attatiinnerneqassappata atuartut nammineersinnaanngitsut ilaqtaminnik pilersuisuunissamut tatisimaneqarnerisa ingerlaannarnissaanut peqataassaagut, tamannalu pilersuisut nammineq meeqqaminnut angerlarsimaffimmini najugaqartunut nammineersinnaanngitsunullu pilersuisussaataaernerannut sanngiillisaataallunilu annikillisaataassaagut. Tapiissutit atorunnaarsinneqarnerat pilersuisussaataaasup pilersuisinnaannginneranik tassanngaannartumilluunniit pisortat ikiorsiissutaannik pisariaqartitsilerneramik kinguneqassagaluarpat pisortanit ikiorsiissutit pillugit malittarisassat atorneqarsinnaapput. Inuiaqatigiinni sanngiinnerit ikiorneqarnissaat siunertaralugu isumaginninnermut inatsiseqarpoq. Tapiissutit pillugit malittarisassat atorunnaarsinneqarnerat isumaginninnikkut pitsaanngitsumik kinguneqassagaluarpat tamanna isumaginninneq pillugu inatsimmi atuuttumi allami periarfissanit nalimmassarneqassaaq. Tapiissutinik aqutsinnermut ilinniartitsisut nukinnik atuiunnaarnissaat, nukiillu taakku nunatsinni meeqqat atuarfiini atuartut atuarnerisa pitsanngorsarneqarnissaanut atorneqarlernissaat amerlanerussuteqartut pitsaasutut isigaat . Peqqussutissap atuutilersinneqarnissaanut atatillugu ilaqtariit pissakinnerusut pineqartut arlaatigut aaqqiivigineqarnissaat eqqumaffigineqartariaqartoq isumaqarpugut. Aammattaaq suli isumaqarpugut ilaqtariit pissakinnerusut isumaginnittoqarfikoorlugu ikiorserneqartassasut, atuarfeqarfik aqutiginagu. Ilisimavarputtaaq ilaqtariit pissakinnerusut Akileraartarnermut Atugarissaarnermullu Isumalioqatigiissitaliami immikkut sammineqartut naatsorsuutigaarpullu taakku arlaatigut aaqqiissutaajumaartunik saqqummiussaqaarumaartut.

Taama ilassutitut oqaaseqarlutik meeqqat atuarfianni klassini qullerni atuartut atuarnermut tapiiffigineqartarnerat pillugu Inatsisartut peqqussutaata atorunnaarsinnera pillugu Inatsisartut Inatsisissaattut siunnersuut akuersissutigineqassasoq amerlanerussuteqartut inassutigaat.

Siunnersuut UKA 2009-mi akuersissutigineqarsinnaasoq Naalakkersuisunit ilimagineqarsimavoq. Tamannali pinngilaq, taamaattumillu siunnersuummut saqqummiunneqartumut allannguutissatut siunnersuuteqarnissaq pisariaqartoq amerlanerussuteqartut isumaqarput, taamaalluni atortuulerfissaa 1. januar 2010-mit 1. juli 2010-mut nuunneqarluni. Atuutilerfissaa allanngorani 1. august 2010-ussaaq.

Ataatsimiititaliami amerlanerussuteqartut siuliani taaneqartut Inuit Ataqtigiit Demokraatillu allannguutissatut siunnersuummik tamatumunnga naapertuuttumik saqqummiussipput, taamaalillunilu siunnersuut ulloq 1. juli 2010-mi atortuulissalluni. Allannguutissatut siunnersuut isumaliutissiissummut uunga ilanngussatut ilanngunneqarpoq.

Amerlanerussuteqartut Inuit Ataqtigiit Demokraatillu allannguutissatut siunnersuut saqqummiunneqartoq akuerineqassasoq, tamatumalu kingorna siunnersuut iluserilikkamisut iluseqarluni akuerineqassasoq inassutigaa.

Meeqqat atuarfianni klassini qullerni atuartut atuarnermut tapiiffigineqartarnerat pillugu inatsisip atorunnaarsinneqarnissaa pissusissamisuumngitsaq **ikinnerussuteqartut Siumumeersu Atassummeersullu isumaqarput**. Nunatsinni ilaqutariippassuarnut meerartalinnut isertitakitsunut akunnattumillu isertitaqartartunut tapiissutit pineqartut qularnanngitsumik pingaaruteqartorujussuupput. Pineqartunut angisuunik aningaasartuuteqarfiusunillu meerartalinnut tapiissutit taakku imaaliinnarlugu peerneqarnerat illersorneqarsinnaanngitsumik isumaginninnikkut kinguneqarnerlussinnaavoq. Ukiuni makkunani pingaartumik isertitakitsut meeqqanik angerlarsimaffimmini najugaqartuutillit aningaasartuutaat annertusiartuinnarput, tapiissutit taakku peerneqarpata taakku atugaat suli artornarnerulissapput. Meeqqat tapiissutisisinnaatitaasut ilaat amerlasuut isorliunerusuni nunaqarfinnilu ukiuni makkunani akit appariartornerannik piniagassanillu killilimmik pisassiisalerneq kingunerisaanik isertitaqarnissamut periarfissaasuasuni najugaqartuupput. Tapiissuteqartarnermi inatsisip atorunnaarsinneqarneratigut nunatsinni innuttaasut sanngiinnerit mianerineqartariaqarnerpaallu ajornerusumik atugaqartinneqalissapput, tamanna sukkulluunniit akuerineqarsinnaanngilaq. Siunnersuut akuerineqassappat, tassuunakkut inuiaqatigiinni isumaginninnikkut assigiinngissuseq annertusarneqaaqqissaq. Ilaqutariit, meeqqat inuusuttullu pillugit misissuinerit kingulliit takutippaat isorliunerusuni nunaqarfinnilu ilaqutariit meerartallit ilaat isumaginninnikkut aningaasaqarnikkullu inissisimanerat mianernartuusoq. Atuartut atuarnermut tapiiffigineqartarnerat atorunnaarsinneqarpat erngummatigaarput suli atuartut naammassinatik aniinnartartut amerlinissaat. Ilimanarmat angajoqqaaminnut inuuniarnikkut tapertaajumallutik aningaasar-siornissaminnut ujartuisut periarfissarsiornissaat annertunerulerumaartoq.

Taamaattumik tupigaarput uuminnga taartaasussamik Naalakkersuisut pilersaaruteqarnermikkut suliluunniit saqqummiussaqaarnatik una atorunnaarsinniarmassuk.

Taama ilassutitut oqaaseqarlutik meeqqat atuarfianni klassini qullerni atuartut atuarnermut tapiiffigineqartarnerat pillugu Inatsisartut peqqussutaata atorunnaarsinnera pillugu Inatsisartut Inatsisissaattut siunnersuut akuerineqarani itigartinneqassasoq, taamaalilluni tapiissutit attatiinnarneqassasut ikinnerussuteqartut isumaqarput.

Allannguutissatut siunnersuut ataatsimiititaliami amerlanerussuteqartunit saqqummiunneqartoq akuerineqassanngitsoq ataatsimiititaliami ikinnerussuteqartut Siumup Atassutillu inassutigaa.

**Taama oqaaseqarluni Ilaqutariinnermut Ataatsimiititaliap siunnersuut aappassaaniigassanngortippaa.**

Debora Kleist  
Siulittaasoq

Jane Petersen

Michael Rosing

Ruth Heilmann

Knud Kristiansen

[Ilanngussaq 1](#)

[Ilanngussaq 1a](#)

[Ilanngussaq 1b](#)